



Kamis, 29 Desember 2022

Ogen: Matius 25:14-30



"Tutus Dingen Bujur"



Megati si begi istilah 'integritas,' adi baba ku bahasa Karo ertina sue kata ras perbahanen. Kata-kata si ibelaken kita e biasana rehna i bas pusuh nari. Janah siilakoken kita e pe rehna i bas perukuren nari. Apai pe rehna i bas pusuh perukuren nari, adi bage me arus sembaba? Adi sue kata ras perbahanenna, ertina e kalak bujur.

Renungenta nuriken perumpaman kalak si bujur dengen tutus ras kalak si la bujur i bas erdahin. Tuan mereken modal guna rusaha man telu kalak juak-juak. Pedah tuan e gelah juak-juak e tutus erdahin janah bujur i bas erdahin. Lit paksana pagi ipindona pertanggungjabapen pendahin e. Tuan e la ngenehen ulih (hasil) si idatken sierdahinna. Saja perlu ia proses i bas erdahin, bujur entah lahang. Kenca seh paksana mulih ku kuta, idilona si telu kalak e, si lima talenta datna ulihna lima talenta, si dua talenta datna ulihna dua talenta, si sada talenta bunikenna modal e, la bujur i bas pemaken talenta e. Si lima ras si dua talenta, iidah tuan e bujur ras tutus. La ia erbual arah ulih si idatkenna. La pe je tuan si ngarak-ngarak ia usur-usurna erdahin. Em gambaren kalak tutus. Tanggungjababna idahikenna alu mehuli. La iukurina kai pagi upahna, saja selaku suruh-suruhan biakna kin erdahin. Jadi kal ate tuanna ngidah karakter juak-juakna si dua e, e maka la iahan-ahankenna kai si lit i bas ia, iberekenna man juak-juakna e, nina: mari kam bengket ku ruangenku, man ras minem kam ras aku. Kai pe pendahin si iampeken man banta kerina arus ipertanggungjababken. La pe lit si ngawasisa, tetap erdahin alu payo. La salah gunakan perulihen si idatken kita janah bujur i bas pemakenna.